

Tikinnermi nioqqutissanik akitsuuteqanngitsunik eqqussisinnaaneq pillugu Namminersorlutik Oqartussat nalunaarutaat

Nioqqutissanik eqqussuineq annissuinerlu pillugit Inatsisartut inatsisaanni nr. 18, 30. oktober 1992-imeersumi § 17 aamma § 46 naapertorlugit aalajangersarneqarput:

Tikinnerq

§ 1. Tikinnerq tassaavoq nunanit allanit, tassunga ilanngullugit Danmarkimit Savalimmiunillu, akitsuuteqarfiusumut tikinnerq.

Imm. 2. Tikinnermi angalasut nioqqutissat tulliini taagorneqartutulli annertussuseqartut akitsuuteqanngitsunik nassatarisinnaavaat pisiarisinnaallugilluunniit:

- 1) Sikaritsit 200-t imaluunniit sikaat 50-t imaluunniit cigarillossit 100-t imaluunniit tupat 250 g,
- 2) Sikaritsinut imusivissat imaluunniit pappiarartassat immertariaannaat 200-t,
- 3) Imigassaq kimittoq (22 pct. sinnerlugu aalakoornartortalik) 1 literi imaluunniit hedviinni (15-miit 22 pct. tikillugu aalakoornartortalik) 2 literi,
- 4) Viinni nerriseq (15 pct. inorlugu aalakoornartortalik) 2,25 literi,
- 5) Immiaaqqat 2 literi,
- 6) Imeruersaatit kulsyretallit 2 literi,
- 7) Tipigissaat 50 g aamma 0,25 literi tipigissoq. Tamakkua saniatigut pinnersaatit tipigissullu allat katillugit annerpaamik 1.000 koruunit nalingannut,
- 8) Sukkulaatinit mamakujuttunillu nioqqutissiat katillugit 4 kg,
- 9) Kaffit aamma tiit katillugit 4 kg, aamma
- 10) Neqi, neqinit nioqqutissiat imaluunniit timmissat katillugit 5 kg.

Imm. 3. Inuit 18-inik ukioqalereersimasut kisimik tupanit nioqqutissianik, imigassanik kimittuunik, viinninik, immiaaqqanillu akitsuuteqanngitsunik eqqussisinnaapput.

§ 2. Nioqqutissanik akitsuuteqanngitsunik § 1, imm. 2-mi taaneqartunik tikittunut nioqquteqarneq taamaallaat mittarfiit niuertarfiini, taamakkuninnga nioqquteqarnissamut Akileraaruseriffiup akuerisaani pisinnaavoq.

Angallassinermi sulisuusut

§ 3. Angallassinermi sulisuusut, tassa imaappoq umiarsuarni timmisartunilu nunat tamalaat akornanni angalasuni angallassissutip ingerlanneqarnerani imaluunniit taassuma iluani suliaqartut, ullut unnuallu 15-it inorlugit sivisussusilimmik Kalaallit Nunaata avataaniikkallarnerup kingorna uternerminni makkuninnga nassarsinnaapput:

- 1) Sikaritsit 60-t imaluunniit sikaat 40-t imaluunniit cigarillossit 50-t imaluunniit tupat 250 g,
- 2) hedviinni 2 literi aamma viinni nerriseq 2,25 literi, kisianni imigassanik kimittuunik pinna-tik,
- 3) Tipigissaat 50 g aamma 0,25 literi tipigissoq.

Imm. 2. Angallassinermi sulisuusut ulluni unnuanilu 15-ini taakkuluunniit sinnerlugit Kalaallit Nunaata avataaniikkallarnerup kingorna tikinnerminni § 1-imi maleruagassat naapertorlugit nioqqutissanik nassarsinnaapput.

Sinerissap avataani sanaartukkani sulisuusut

§ 4. Sinerissap avataani sanaartukkani, matumani aamma qilleriviusuni kiisalu qilleriviliani ineqarfuitigisuni sulisuusut, aatsitassanik imaluunniit ikummatissanik misissueqqaarnermut, misissueqqissaarnermut qalluinnermullu atatillugu sulisut akitsuuteqarfiusup iluani niunerminni akitsuuteqanngitsunik nassarsinnaavaat:

- 1) Sikaritsit 60-t imaluunniit sikaat 40-t imaluunniit cigarillossit 50-t imaluunniit tupat 250 g.

Imm. 2. Akitsuuteqannginnissami piumasaqaataavoq ulluni unnuanilu minnerpaamik 15-ini akitsuuteqarfiusup avataaniikkallarsimanissaq.

Imm. 3. Imm. 1 naapertorlugu akitsuuteqannginnissaq taamaallaat nioqqutissanut akitsuuteqarfiusup avataani pisiarinqarsimasunut atuuppoq.

Angallatit aalisariutit nunanit allaneersut

§ 5. Angallatinut aalisariutinut nunanit allaneersunut Kalaallit Nunaata imartaani aalisartunut, aammalu umiarsuarnut Kalaallit Nunaata imartaaniinnerminni akitsuutiniq akiliisussaatinneqanngitsunut tunngatillugu, nioqqutissat umiarsuarmi nassarneqartut inuttamut ataatsimut ullup unnualla ataatsip ingerlanerani akitsuuteqanngitsunik atorineqarsinnaapput: viinni nerriseq 1 literi, imaluunniit hedviinni 0,5 literi, imaluunniit imigassaq kimittooq 0,25 literi imaluunniit immiaaqqat 2 literi kiisalu tupanit nioqqutissiat 40 g, siviunerpaamik ulluni 28-ni.

Imm. 2. Umiarsuarni inuttaasut, imm. 1 naapertorlugu nioqqutissanik akitsuusigaanngitsunik pissarsisimasut, akitsuuteqarfiusumiit aallarnissartik pissutigalugu umiarsuarmiit niusimasut nioqqutissanik akitsuusigaanngitsunik § 3-mi annertussusissatut aalajangersakkat anner-toqqataannik nassarsinnaapput.

Imm. 3. Imm. 1 naapertorlugu akitsuuteqannginnissaq taamaallaat nioqqutissanut, umiarsuup akitsuuteqarfiusup avataani pisiarisimasaanut atuuppoq.

Takornariat nunat allamiut umiarsuaannut ilaasartaatinut ilaasut

§ 6. Takornariat nunat allamiut umiarsuaannut ilaasartaatinut ilaasut umiarsuup Kalaallit Nunaata imartaaniinnerani akitsuusigaanngitsunik atugaqarsinnaatitaapput.

Imm. 2. Takornariat imm. 1 naapertorlugu akitsuusigaanngitsunik atugaqartut tupanit, sukkulaatinit aamma mamakujuttunit nioqqutissiat nammineq atugassamik saniatigut nioqqutissanik akitsuusigassanik nunaliaasseqqusaanngillat. Angerlamut angalaneq Kalaallit Nunaat aqqusaarlugu aallartippat takornariat nioqqutissanik akitsuuteqanngitsunik § 1 naapertorlugu nassarsinnaapput.

Imm. 3. Imm. 1 naapertorlugu akitsuuteqannginnissaq taamaallaat nioqqutissanut, umiarsuup akitsuuteqarfiusup avataani pisiarisimasaanut atuuppoq.

Inuit akitsuuteqarfiusumi aalajangersimasumik najugaqanngitsut najugaqarallartuunngitsulluunniit

§ 7. Inuit akitsuuteqarfiusumi aalajangersimasumik najugaqanngitsut najugaqarallartuunngitsulluunniit angalanerni nammineq atugassatut akitsuuteqanngitsumik eqqussinnaavaat tipigissaatit, pinnersaatit tipigissullu, nioqutissanik eqqussuinermit akitsuutit pillugit Inatsisartut inatsisaanni nr. 19, 30. oktober 1992-meersumi § 1, nr. 18 naapertorlugu akitsuusigassaat, Akileraaruseriffiup taakkua annertussuui suunerilu piffissap angalaffissap sivilissusianut naleqquttuusorippagit.

Akitsuuteqannginnissamut piumasaqaat

§ 8. § 1 aamma §§-it 3-miit 7-imut malillugit akitsuuteqannginnissamut piumasaqaataavoq nioqutissat imaluunniit angalanermi atortut inummit nassarneqarnissaat imaluunniit inuup nammineq nassataaniitineqarnissaat, taamaalillugit nioqutissat imaluunniit angalanermi atortut Akileraaruseriffimmut takutinneqarsinnaanngorlugit.

Nakkutilliineq

§ 9. Suliffeqarfiit nioqutissanik akitsuusigaanngitsunik tikittunut nioqquteqarnissamut akuersisummik peqartut, tak. § 2, imigassanik aalakoornartortalinnik kiisalu tupanit nioqutissianik tunisaqarnerminni piumasarissavaat angalasup ikilernermit allagartaq, pineqartup nunamit allamiit tikinnerminik uppersaatitut takutissagaa.

Imm. 2. Ikilernermit allagartap imm. 1-mi taaneqartutut takutinneqarnerani, ikilernermit allagartaq nalunaqutserneqassaaq imaluunniit allagartap imigassanik aalakoornartortalinnik imaluunniit tupanit nioqutissianik pisinermi atorveqarsimanera arlaatigut takussutissinneqassalluni.

Imm. 3. Ikilernermit allagartat imm. 2-mi taaneqartut imigassanik aalakoornartunik tupanillu nioqutissianik pisinermut ateqqinneqarsinnaanngillat.

Pineqaatissiinerit

§ 10. § 1, imm. 2-mi 3-milu, § 2-mi, § 3, imm. 1-mi, § 4, imm. 1-mi 3-milu, § 5, imm. 1-miit 2-mut, § 6, imm. 2-mi, § 7-mi aamma § 8-mi aalajangersakkanik piaarluneerluni mianersuaalliorujussuarluniluunniit unioqutitsisoq unioqutitseriarluartorluunniit Kalaallit Nunaanni pinerluttulerinermik inatsimmi maleruagassat naapertorlugit akiliitsisinermit pineqaatissinneqarsinnaavoq.

Imm. 2. Imm. 1-mi taaneqartutut unioqutitsisoqarpat unioqutitseriarluartoqarpalluunniit nioqutissaq, taannaluunniit peqanngippat aningaasat taassuma aningaasanngorlugu nalingata amerlaqatai, akiliitsisinermit pineqaatissiisoqarpat pineqaatissiisoqanngikkaluarpalluunniit, Kalaallit Nunaanni pinerluttulerinermik inatsimmi maleruagassat naapertorlugit arsaarinnissutigineqarsinnaapput.

Imm. 3. Imm. 1 naapertorlugu akiliitsissutit Landskarsip pisassarai.

Imm. 4. Imm. 2 naapertorlugu arsaarinnissutit Landskarsip pisassarai.

Atortuulertia

§ 11. Nalunaarut manna 1. november 2012-mi atuutilissaaq.

Imm. 2. Tamatumunga peqatigitillugu tikinnermit nioqutissianik akitsuuteqanngitsunik eqqussisinnaaneq pillugu nalunaarut nr. 24, 20. december 2010-meersoq atorunnaarsinneqarpoq.

Kalaallit Nunaanni Namminersorlutik Oqartussat, ulloq 25. oktober 2012

Maliina Abelsen

/

Jan H. Lynge-Pedersen

Namminersorlutik Oqartussat

Imaneq 4

3900 Nuuk

E-mail: nsninatsit@nanoq.gl

Linkit iluaqutaasussat

Kalaallit Nunaanni inatsisinut nalunaarutit

Namminersorlutik Oqartussat inatsisinut toqqorsiviat

Naalakkersuisut